

隆昌縣志卷四

形勢

山續脈於終南形蟠結於蓮萼晴登道觀俯樓閣
之崢嶸月射隆橋看江天之掩映樓峯擁翠鵝洞
沉潭鄉分二十有五城周三百餘丈爲巴蜀之通
衢洵戎州之鉅邑志形勢

按前邑令劉琨修城樓落成刊石志曰地形發源
於終南熊耳自北而來蜿蜒數千里至其地繇且
一山名曰雲頂然後轉折起伏結爲縣治宛若蓮
花縣署居於花房左右環抱前後朝拱形勢儼然
秀而明眞而正爲川南縣治之最